

■ GIURA-BERNA

Moutier va da Berna tar il Giura

(fmr/gc) Cun 2114 (ca. 55%) cunter 1740 vuschs, pia cun ina differenza da 374 vuschs, han votantas e votants da la citad da Moutier, che sa chatta en il Giura dal Sid, pia sin territori bernais, decidì dumengia passada da midar vi tar il chantun Giura ch'exista dapi 1979. Tar ils aderents da la midada regia entusiassem euforic, entant ch'il chantun Berna deplorescha da perder cun Moutier ca. 7500 abitantas ed abitants e ch'è lura anc la chapitala dal district cun il medem num.

La votaziun a Moutier – sut severa egida da l'Uffizi federal da giustia – saja stada la pli complexa che ha gi lieu insacura en Svizra pertutgant controllas dal register da votants, prescripziuns concernent finanziaziun e comunicaziun als dus chantuns pertutgads (Berna e Giura). Ins vuleva numnadamain evitar per tut pretsch scadina irregularitad per ch'il conflict dal Giura na sa traja anc betg vinavant a la lunga. Cun il plebiscit dal zercladur 2017, davart la midada da Moutier tar il chantun Giura, avevan ins fatg nauschas experientschas. Lura aveva la differenza tranter GEA e NA mun-

tà be a 137 vuschs en favur dals autonomists per la midada (2067 GEA, 52%) e 1930 NA).

Il plaschair dal GEA era dentant da curta durada. Ils dubis e fatgs incorrects succedids tar l'andament da la votaziun eran uschè gronds che la Dretgira administrativa bernaisa ha declerà la votaziun da 2017 per betg valaivla. Sco positiv è lura dentant sa mussà che las duas partidas han renunzià da trair vinavant la decisiun da la Dretgira bernaisa al Tribunal federal ed èn stadas d'accord da repeter la votaziun. Quella ha gi lieu la dumengia passada. Ils observaturs che la Confederaziun ha gi tramess a Moutier per survegliar la votaziun, han pudì communitgar dumengia saira ch'ins n'haja constatà naginas irregularitads.

Ils proxims onns vegnan ils dus chantuns pertutgads, Berna e Giura, a fixar las modalitads per la midada da Moutier dal chantun Berna tar il Giura. Il chantun Giura giavischass che questa midada entrass en vigur l'entschatta da l'onn 2026. Alura fiss il conflict dal Giura, che ha durà en tut 75 onns, finalmain a fin.